

四庫全書

史部

欽定四庫全書

史部

建炎雜記乙集卷二

詳校官編修

臣范永宗

編修

臣

程嘉謨覆勘

總校官編修

臣

王燕緒

校對官助教

臣

卜維吉

謄錄監生戴典

欽定四庫全書

建炎雜記乙集卷十

宋 李心傳 撰

上德一

壬午內禪志

孝宗皇帝以聖德受天命實繇高宗皇帝之睿志素定
然始則昭慈聖獻皇后感動上意終則憲聖慈烈皇后
密贊大策至於將相士大夫輸忠叶謀共成聖志者蓋

亦多助而范宗尹趙鼎陳康伯三丞相建明將順皆賴其力尤不可使之無傳也孝宗皇帝太祖七世孫也初太祖少子秦康惠王德芳生英國公惟憲惟憲生新興侯從都從都生華陰侯世將世將生東頭供奉官追封慶國公令諱令諱生秀安僖王子偶

仙源類譜

秀王舉進士

中第靖康末為秀州嘉興縣丞王夫人祥符張氏嘗夢一人擁一羊謂之曰以此為識已而有娠

熊克中興小愿

建

炎元年冬十月戊寅夜生上于青杉閣之官舍

王明清揮麈錄

紅光滿室如日正中

玉牒

少長訓名伯琮

以制詞增入

先是高

宗皇帝以五月朔即位於南京六月賢妃潘氏生皇子

九月賜名專封魏國公十月高宗幸維揚三年二月渡

江幸杭州三月苗傅劉正彥為變四月朔高宗復辟立

魏國公為皇太子五月幸江寧丁亥太子薨諡元懿

日曆

殯治成之鐵塔寺

周必大二老堂雜記

後三日仙井監鄉貢進士

李時雨上書乞擇宗室之賢者使視皇太子事俟皇嗣之

生退居藩服時雨黨人親子也以父入籍當補官吏部

擬將士郎抄未下書奏詔前降級還恩澤指揮更不施

行日下押出國門

時雨事迹開禧元年被旨宣付史館

四年夏高宗自海

道還會稽其秋昭慈聖獻皇后亦自江西還行在后嘗

感異夢密為高宗言之高宗大寤

此事臣聞之先臣及士大夫所言皆同蓋

汪應辰早年嘗所聞於趙鼎者

會宰相范宗尹有造膝之請高宗又命

惠襄靖王令廣選藝祖之後宗子數人育之宮中令廣

時以秘閣修撰提舉臨安府洞霄宮也明年改元紹興

其夏四月時慈獻升遐而令廣所選宗子皆未當上意

五月遂命李時雨知南外宗正事俾至泉南選之日會上

虞丞永嘉婁寅亮上書言今昌陵之後寂寥無聞僅同

民庶藝祖在上莫肯顧歆此敵國所以未肯悔禍也望

陛下於伯子行內遴選太祖諸孫有賢德者視秩親王

以待皇子之生退出藩服高宗讀之大以感歎簽書樞

密院事富直柔又從而薦之有旨召對其年六月也王明

清揮塵錄後七日戊子高宗諭大臣曰昨令時雨選藝祖之

後宗子三二歲者得四五人資相皆非岐嶷且令歸

家侯至泉南選之右僕射范宗尹曰此陛下萬世之慮
高宗曰藝祖以聖武定天下而子孫不得享之遭時多
艱零落可憫朕若不取法於仁宗為天下計將何以慰
在天之靈同知樞密院事李回曰藝祖不以大位私其
子發於至誠陛下為天下遠慮合於祖宗實可昭格天
命參知政事張守曰堯舜授受皆以其子不肖藝祖諸
子不聞失德而傳位於太宗過堯舜遠甚高宗曰此事
亦不難行止是道理所在止令於伯子行中選擇庶幾

昭穆順序富直柔曰陛下聖斷超越千古第恐令李不足
以承奉旨高宗曰但令廣求當自選擇參知政事秦

檜曰須擇閨門有禮法者

檜為參知政事而奏對在諸臣之後所言止此其人包藏

顧望之心已可見矣

高宗曰當如此直柔曰宮中有可付託者否

高宗曰朕已得之矣若不先擇宮嬪則可慮之事更多

日是時張賢妃為婕妤憲聖慈烈皇后為才人高宗所

擇宮嬪盖才人與婕妤也八月知樞密院事宣撫處置

使張浚念上繼嗣未立密奏乞明詔大臣講明故事多

擇宗室之賢優禮厚養以為藩屏

朱熹撰
浚行狀

浚時駐軍閭

中蓋未知朝廷之議也寅亮既對十一月遂除監察御

史

歷日

二年正月高宗還臨安二月寅亮為秦檜所擠而

罷夏令李始奉詔選上及宗子伯浩入禁中伯浩豐而

澤上清而癯高宗初愛伯浩忽曰更仔細觀之乃令二人

並立有猫過伯浩以足蹴之上拱立如故高宗曰此兒

輕易乃爾安能任重邪乃賜伯浩白銀三百兩罷之而

育上于張婕妤所時上年六歲矣五月辛未詔秀王赴

都堂審察遂特改京官三年二月庚子詔宗室伯琮除和
州防禦使賜單名從玉令學士院擬二十字各注意義
進入高宗自擇瑗字名之

會要

時學士綦崇禮也後二日

壬寅改貴州防禦使三月詔貴州防禦使育在宮中不
可與宗室比特給直俸從內東門司供納

會要

時朱勝非

為相也四年五月令廣復得秉義郎子彥之子伯玖入

宮中年五歲高宗以其聰慧可愛命吳才人母之

日厯附傳

丁丑子彥特遷武翼郎而令廣自左中大夫集英殿修

撰特轉行在大中大夫知泉州後省以轉官非法封還
錄黃遂寢其命九月朱勝非罷趙鼎相五年二月鼎轉
左僕射而張浚為右僕射浚面謝又以儲貳為言高宗
首肯曰宮中見養藝祖之後二人長者年九歲不久當
令就學浚行上狀詞月餘出使江上五月高宗諭鼎令
擇日降制除舊名為節度使封國公鼎退與參知政事孟
庾同知樞密院事沈與求議之辛巳鼎奏陛下為宗廟
社稷大慮臣謹令有司卜以今月二十六日吉惟陛下

裁之幸甚高宗曰可與求曰此盛德事也而陛下斷自
聖心行之不疑臣知天祐陛下子孫千億受厯無疆矣
高宗曰朕年二十九未有子然國朝自有仁宗皇帝故
事今未封王止令建節封國公似乎合宜以朕所見此
事甚易而前代帝王多以為難鼎曰自古帝王都以為
難而陛下行之甚易此所以未可跂及也然陛下春秋
鼎盛而為宗廟社稷大慮如此臣等以是知神靈扶持
子孫千億也此事甚大陛下既已見透臣等無復更措

一詞不勝幸甚高宗曰藝祖創業肇造王室其勤至矣
朕取子字行下子鞠於宮中復加除拜庶幾仰慰藝祖
在天之靈庾曰陛下念藝祖創業之難而聖慮及此帝
王所難能之事也日高祖又謂鼎曰此子資秉特異儼
若神人朕自教之讀書性極強記玉牒鼎先得旨於行宮
門外造書院一區欲令就學至是成高宗曰只以書院便
為資善堂俟除授訖命儒臣為直講翊善悉如資善故
事已亥遂降制授保慶軍節度使封建國公以宗正少

卿范冲為徽猷閣待制提舉建隆觀兼資善翊善起居
郎朱震兼贊讀時學士孫近草建國公制第云眷求屬
籍蚤毓宸闈而舍人胡寅草制云朕為宗廟社稷大計
不敢私于一身選於屬籍得藝祖七世孫鞠之宮中茲
擇剛辰出就外傳斐然集由是人皆曉然知上意也六月
己酉建國公出資善堂高宗命見冲震皆設拜宰執得
旨依故事謁見又詔建國公祿賜比皇子日冲震皆一
時名德老成冲祖禹子尤有家法每因箋疏遵以經術

仁義之言輒標袖藏之時一展玩

實錄

七月秀王召對自

左宣教郎直秘閣添差通判湖州特遷左朝奉郎秘閣

修撰知處州未行改在外宮觀奉賜如郡守

日曆

十一月

浚自江上使還六年正月壬午詔伯玖賜名璩除和州

防禦使後四日浚復往荆襄視師既而鼎浚以戰守論

議不同十二月鼎為左司諫陳公輔所攻而罷浚獨相

自是攻鼎者始以資善藉口矣

鼎事實

七年正月陳與義

參知政事二月以太陽有異詔內外侍從各舉直言極

諫之士一人徽猷閣直學士知漳州廖剛應詔言陛下
有建國公之封將以承天意而矢大公於天下後世者
也然而不遂正名為子者豈有所待邪有所待則是應
天之誠未至也願陛下昭告藝祖在天之靈正建國儲
君之位布告中外不匿厥指異時雖有則百斯男不復
更易則足以達天意而轉禍為福矣七月以旱詔中外
臣民言封事左宣教郎簡州州學教授臨邛黃源應
詔言陛下嘗選宗親之賢納之宮中典冊所加已上公

矣此誠社稷之至計然而其名未正無以副天下之望
臣恐左右前後或懷姦心者朝暮浸潤以行其譖非社
稷之福也今天下多故事在他日必得長君非赤子可
得而卧治毋后可得而專制也陛下必不得已姑少須
之何不使攝居儲貳之位皇嗣之生退居藩服社稷豈
不益固九月浚以淮西失師而罷鼎復相八年正月進
士李獻燾反正議奏乞擇宗室之賢者使攝儲貳或留
守形勝或別出征伐使民無異望三月秦檜復為右僕

射陳與義罷參知政事八月御筆遽除節度使封吳國公
執政聚議檜謂鼎曰陳去非在政府時已有此意但未
及行不知公意如何鼎扣其可否檜不答樞密副使王
庶曰並后匹嫡古以為戒今豈可行也鼎謂檜公嘗言
鼎丙辰罷相後議者專以資善堂籍口今當避嫌公專
面納此御筆如何檜曰公為首相而檜豈敢專公欲納
之當同敷奏也翌日進呈檜無語鼎奏曰今建國公在
上名雖未正天下之人知陛下有子矣以前恩數並同

皇子又昨幸平江及謁太廟而令建國扈蹕國人見者
咨嗟太息此社稷大計蒼生之福也至于外間稱呼之
語陛下豈有不聞之耶臣身為上相義當竭忠以報陛
下在今日禮數不得不異但以善繫人心而不使之二
三其說也高宗曰俱是童稚姑與放行鼎執奏不已高
宗乃留御筆曰俟三數月議之明日檜留身奏事後數
日參知政事劉大中亦以為言他日鼎留身奏曰昨所納
御筆檜與大中有何奏耶高宗曰大中之說與卿一耳

十月鼎為檜所擠復丐免高宗問前日所議據建節事

如何鼎又如前所陳

並鼎遺事

丁巳大中免甲戌鼎罷九年

三月制授據保大軍節度使封國公是月金人歸河南

地十年五月金人畔盟京西湖北宣撫使岳鵬舉密奏

今日欲圖恢復必先正國本以安人心然後陛下不常

厥居以示不忘復讐之意先是岳侯入對得于資善堂

見國公英明俊偉退語家人遂上此奏

張戒默記以岳侯講建儲為紹

興七年事而岳侯監鎮江府大軍庫珂作岳侯行實係之此年且辨默記之誤甚悉今移附此更須詳考也

十一年岳侯為檜所誣以十二月晦賜死大理寺獄日

十二年正月庚戌詔建國公出就外第加檢校官封郡

王令吏禮兩部及太常寺討論祖宗故事申尚書省取

旨庚午張婉儀卒贈賢妃建國公初育于妃所至是吳

婉儀收而併視之與璩同處雖一食必均焉紹興聖語丁丑

制建國公加檢校少保封普安郡王時年十六制下日

者尤納私謂秘書省正字張閼曰普乃並日二字合乎

易所謂明兩作離之象殆天授也張閼記聖德事迹初吏禮部

之討論也吏部尚書吳表臣禮部尚書蘇符並兼翊善
與禮部侍郎陳侑員外郎方雲翼太常丞丁仲京博士
王普主簿蘇籍同奏與秦檜意異已丑詔表臣等討論
典禮並不詳具祖宗故事專任己意懷姦附麗並放罷
日始檜嘗為高宗言趙鼎欲立皇子是待陛下終無子
也宜待親子乃立林泉野記所謂附麗蓋指鼎也頃嘗以符所議問於
其孫知新繫縣事植亦不能知當從吳龜年家問之
五月詔普安郡王朝朔望已
亥秘書少監秦梓兼資善堂贊讀以璩未出閣故秦檜泥

之也普安郡王府別以館伴趙錢周材二人兼教授壬寅上出閣就外第八月和議成顯仁皇太后自五國城來歸上從高宗奉迎于臨平鎮十三年九月乙丑秀王以左朝奉大夫秘閣修撰主管台州崇道觀致仕日歷遂卒於秀州十四年普安郡王納夫人郭氏郭祥符人也會秀王喪聞戊寅詔侍從臺諫集議普安郡王當持何服議者張澄李文秦檜秦熺周三畏王暎劉才紹詹大方張叔獻段拂操何若澂僉奏照國朝要典嘉祐四年

九月詔使臣內殿崇班卒以上遭父母喪並聽解官行服

宗室解官給俸乞依故事庚戌秦檜進呈高宗曰始議

養宗室子今子偁死若不使之持服則非本朝典故宜

從其議

日歷

六月詔秀王許用普安郡王初除節度使贈

太子少師令秀州量行應副葬事遂葬湖州城外之箐

山

會要

始普安既解官而蘇符以左朝散郎除知遂寧

府未上諫官詹大方劾符居論思之地識慮淺暗除其

二官

會要

蓋指前事也大方遷御史丞遂論責授清遠軍

節度副使潮州安置趙鼎輔政累年不恤國事邪謀密計深不可測與范冲輩咸懷異意以徼无妄之福用心如此不忠孰甚焉九月移鼎吉陽軍安置

日曆

三年死于

貶所十五年二月制加璩檢校少保封恩平郡王出閣就外第號東西府

附傳

八月初命館職二員並兼普安思

平二王府教授時福州州學教授黃石代還獻書于檜曰上即位十九年儲貳未建安危所繫重大如此公獨不開陳乎不報後七年石調官入都復申前論檜曰君

謂檜不省耶時未可耳

周必大撰石墓誌有此檜面諭石乃二十二年也

十六

年四月乙丑普安郡王免喪還舊官

實錄

十七年六月戊

午改常德軍節度使二十二年八月子彥以右武大夫忠州

團練使卒恩平解官如前議二十四年夏衢州盜起秦

檜遣殿前司將官辛立將千人捕之不以聞上因入侍

言之高宗大驚明日以問秦檜檜曰不足煩聖慮故不

敢聞俟朝夕盜平則奏矣退而求其故知上言之乃謂

上在秀王喪二年不當給俸月除二百緡上白高宗高

宗乃自出內帑月如所除給焉

晁公遡箕山日記有此但無年月及所遣將姓

名今以日歷參攷修入上之英武為檜所憚此其一也不可不載俾後有攷

二十五年十月

檜疾篤其家秘不以聞謀請熈代上又密啟之

往歲在行在聞

士大夫所言如此

高宗即日幸其家視疾遂降制勒熈致仕是

夕檜薨二十六年閏十月秘閣修撰辛次膺入對論國

本末上立改容曰誰可次膺曰知子莫若父上稱善

胡銓

撰次膺墓誌

未幾國子司業兼從正殿說書王大寶因侍經

筵密陳宗社大計上諭以措置已定時相惡之十一月

辛卯奏以大寶直敷文閣知温州

胡銓撰大寶墓誌

二十七年

春高宗策進士晉原閻安中對曰太子天下之本陛下嘗修祖宗故事累年于茲矣日就月將緝熙光明之學其歷試周知不為不久也而儲位未正嫡長未辨臣愚深恐左右前後之人寢生窺伺漸起黨與間隙一開有悞宗社大計此進退安危之機也願斷自宸衷蚤正儲位以係天下之望自秦檜得政士大夫無敢以儲副為言者高宗覽其對而留意之遂擢為第二十八年冬

新除利州路提點刑獄范如圭引疾乞奉祠因秦漢
胎養令遂纂至和嘉祐名臣乞選宗室章疏二十六篇
囊封以進且言曰願陛下深考羣言仰師成憲斷以公
道無疑無貳則天下幸甚時宗藩並建道路竊竊有異
言人或以越職言乃為如圭危之如圭不顧也疏入高
宗感其言朱熹撰如圭墓誌二十九年六月丁酉國子博士史
浩對于內殿將退復奏曰小臣冒萬死以畢愚忠普安
恩平皆聰明宜擇其賢者浸別異之以係天下之望高

宗頤之浩退高宗目送焉翌日命除秘書郎甫四日兼

二王府教授

史稱大世家

九月甲午陳康伯除右僕射面謝

因及范如圭所進嘉祐至和章疏高宗問如圭之意如

何康伯曰如圭可謂愛君之至言之不盡故類聚以進

呈高宗曰朕久有此意康伯曰宸斷堅決乃可高宗首肯

之

康伯附傳

高宗已深知上之賢孝恐顯仁后意所未欲故

遲遲焉

紹興聖語

會后已服藥後六日皇太后崩十二月乙

丑端明殿學士提舉萬壽觀兼侍讀張燾告滿還朝奏

疏曰儲貳天下之本自古人主必致重於此其或嗣子
未生必取之兄弟之子漢成帝立定陶王是也其或兄
弟之子無其人必取之宗室之子以待嗣子之生真宗
皇帝是也至于仁宗皇帝其事尤詳矣陛下聖見高明
選建二公而子育之亦有年矣然臣聞之傳曰兩貴不
能以相事又曰物莫能兩大此天下之常理也願陛下
權時之宜斷自淵衷稍優其禮加以國封而別異之則
天下之心皆有所屬矣高宗愀然曰朕懷此意久矣此

事人所難言卿言契合朕心俟開春當議典禮翌日遂

以燾為吏部尚書

張燾年譜

時郁民望為諫官左宣教郎知

大冶縣蕭之敏貽書民望以司馬光范鎮事語之民望

不能用也

周必大撰之敏墓誌有此

三十年二月壬子百官以顯仁

喪禮畢始純吉服是日宰相湯思退陳康伯樞密院奏

事畢將退高宗留知院事王綸同知院事葉義問諭之

曰朕有一事所當施行似不可緩普安郡王甚賢欲與

差別卿等可議除少保師相仍封真王衆皆前賀高宗

曰朕久有此意深惟載籍之傳並后匹嫡兩政耦國亂之本也朕豈不知此第恐顯仁皇后意所未欲故遲遲至今思退曰陛下春秋鼎盛上天鑒臨必生聖子為此以係人心不可無也高宗曰此事出於朕意非因臣下建明且顧康伯曰去年卿留奏事朕亦嘗及此事甚無難者卿等宜檢典禮進呈宰執思退留身言適奉聖訓非古帝王所及高宗曰朕覽唐宣宗事群臣有議及儲嗣者輒怒斥去可謂不達理矣於是上育宮中已三十

年天資英明豁達大度左右未嘗見喜愠之色趨朝奏
列進止皆有常度騎乘未嘗妄視平居服御儉約每以
經史自適嘗語府寮曰聲色之事未嘗畧以經意至于
珠寶瑰異之物心所不好亦未畜之騎射翰墨皆絕人
高宗嘗謂近臣曰卿亦見普安乎近來骨相一變非常
人比也玉牒於是張燾力求去高宗留之不可丁卯以燾
為資政殿學士致仕年譜戊辰三省樞密院進呈普安郡
王加官移鎮進國名及宣制吉日思退曰少保開府自

元豐以來不並入銜更取聖裁高宗曰封真王須開府儀同三司且可除使相思退曰臣等按典禮非至親不封真王今進封則當冠以屬籍如環衛官稱皇姪之類高宗曰可使以為皇子者若此則瑗諸子亦合加恩數卿等可議定進呈又曰更有一事璩亦與少恩數令判大宗正事置司紹興如此則皆定矣思退言立皇子當降詔及遣官告宗廟高宗從之癸酉高宗始服淡黃袍犀帶御垂拱殿思退等奏立皇子恐合依故事改賜名字

其名乞留中奏事退御筆付三省瑗可立為皇子改名

璋令學士院降詔

日歷

遂召學士周麟之至都堂諭旨草

詔進入

熊克小歷以為楊椿草詔誤也海陵集有此詔也

甲戌內出手詔曰朕

荷天祐序承列聖之丕基思所以垂裕於後旦暮不敢

康永惟本支之重彊固王室親親尚賢厥有古誼普安

郡王瑗藝祖皇帝七世孫也自幼鞠于宮闈巖然不羣

聰哲端重閱義有立元於宗藩歷年滋多厥德用茂望

實之懿中外所聞朕將考禮正名昭示天下夫立愛之

道始于家邦自古帝王以此明人倫而厚風俗者也稽

古前憲非朕敢私其以瑗為皇子仍賜名瑋

玉牒

乙亥召

學士楊椿諭旨鎖院

陳良祐撰
楊椿墓誌

丙子制授皇子寧國節

度使開府儀同三司進封建王制既出朝士動容相喜

中外大悅丁丑宰執入賀高宗曰昨日宣詔相見人心

喜悅三月丙午制授恩平郡王璩開府儀同三司判大

宗正事置司紹興府始稱皇姪丁未樞密院奏事高宗

曰璩昨日之除如何王綸對曰陛下春秋鼎盛已為宗

社無窮之計今日談笑裁決略無難色高宗曰朕決此計已九年建王所佩玉魚乃置權場之初令置此玉以脩今日之用舉此即可知矣二王朕育之宮中三十年瑋始育于張婕妤璩乃育于皇后自張之没后收而並視之今日之除后意與朕合

寶錄

四月詔建王賜字元環

玉璫有此周麟之御書玉堂跋
尼云麟之被旨撰皇子賜字

三十一年九月金人入

寇十月朔下詔親征壬子建王以明堂恩改鎮南節度使時兩淮失守廷臣爭陳退避之計上不勝其憤請率

師為前驅直講史浩以疾告數日矣聞之亟以晉申生
漢惠帝事入示上力言太子不可將兵且曰危難之時父
子安可跬步相違事變之來有不由已者唐肅宗靈武
之事是已肅宗第得早為天子數年而使終身不得為
忠臣孝子誠可惜也上乃大感悟曰將若之何浩乃為
草奏痛自悔過請衛從警蹕以共子職因中宮以奏高
宗方疑怒覽之意頓釋問知其奏出於浩詰朝語大臣
曰史浩真王府官也

史稱大世家

既而殿中侍御史吳芾求

對乞以上為元帥先往撫師

朱熹撰
芾墓誌

浩復遺大臣書言

建王生深宮中平居未嘗與諸將接安能辨此議者又謂主上親征可使王居守浩復以為不可高宗亦欲令上徧識諸將十二月遂扈蹕如建康時方雨雪高宗御氍毹乘馬上亦騎從雨漬朝服畧不少顧而宰相已下

多肩輿者

趙性之中
興遺史

三十二年二月高宗還臨安傳位

之意已決懲宣和吳敏輩自以為功不以語羣臣中書

舍人唐文若獨請對言不宜急速

周必大跋文
若帖有此

會左僕

射陳康伯乞去位高宗曰更待三數月康伯喻意不復
言既而高宗益倦勅康伯密贊大議且曰今不正名恐
有臣下疑似之心且諸將分屯江上必使之曉然咸知
聖意遂草立皇太子手詔以進

康伯
附傳

五月甲子內降詔

曰朕以不德躬履艱難荷天地祖宗垂祐之休獲安大
位三十有六年憂勞萬幾宵旰靡殫屬時多故未能雍
容釋負退養壽康今邊鄙粗寧可遂始志而皇子瑋毓
德允成神器有託朕心庶幾可立為皇太子

實錄

仍改名

煜是時呂廣問權禮部侍郎康伯外姻也廣問適以土
王祠黃帝而監察御史周必大監祭康伯折簡齋宮密
議典禮廣問見必大因及之必大曰煜字與唐昭宗名
同音可乎廣問告康伯亟取旨改賜名昀御札今藏周必大家十月
賜字元永王牒先是以望仙橋東秦檜舊第為新宮六月
戊辰名曰德壽宮命內侍張無為領之日後數日御
筆追崇皇太子所生父中書舍人唐文若既書黃矣因
過周必大共歎聖德不可及而疑名稱未安歸白宰相

請更黃而堂吏不可文若執不已宰相以聞改稱皇太

子本生親

周必大省齋文藁

尋又詔宗室子偁并妻合行加封

令侍從臺諫禮官討論典禮聞奏遂就御史臺議於是翰林學士洪遵等奏欲依國朝封贈宗室近屬例高官大國極其尊崇庶於人情義理皆為宜稱子偁為皇兄贈太師追封王賜謚妻封王夫人甲戌詔皇兄故左朝奉郎大夫秘閣修撰贈太師少師偁加贈太師中書令追封秀王謚安僖妻宜人張氏封王夫人殿中侍御史

張震同右正言袁孚共論右僕射朱倬乙亥倬除職奉

祠洪遵草制略曰千秋無閼閼切早緣寢意又曰元良

天下之本乃覬疇庸日震乞報行言章不許無隱是日

高宗內出御札曰朕宅帝位三十有六載荷天之靈宗

廟之福邊事寢寧國威益振惟祖宗傳緒之重兢兢焉

懼不克任憂勤萬機弗遑暇逸思欲釋去重負以介壽

臧蔽自朕心亟決大計皇太子脊賢聖仁孝聞于天下

周知世故久繫民心其從東宮付以社稷惟天所相非

朕敢私皇太子可即皇帝位朕稱太上皇帝退處德壽宮皇后稱太上皇后一應軍國事並聽嗣君處分朕以澹泊為懷頗神養志豈不樂哉尚賴文武忠良同德合謀永底于治詔乃洪遵等草也

中興玉堂制草

丙子高宗行內禪

之禮百官班列紫宸殿下有司設黃麾仗五百人太常官樂工百人設而不作先是高宗嘗諭上以傳禪上流涕固辭至是遣中使召上入禁中復加面諭上推遜不受即趨側殿門欲還東宮高宗勉諭再三乃止於是高

宗出御紫宸殿百官起居畢左僕射陳康伯知樞密院
事葉義問參知政事汪澈同知樞密院事黃宗舜陞殿
奏陛下超然高蹈有堯舜之舉臣等不勝欽贊第自此
不獲日望清光犬馬之情無任依戀因再拜泣下高宗
亦為之揮涕曰朕在位三十六年今老且病久欲閒退
此事斷在朕意亦非由臣下開陳也卿等宜勉力以輔
嗣君康伯等奏皇太子賢聖仁孝天下所知昨聞謙遜
太過未肯即御正殿高宗曰朕已再三邀留今在殿後

矣上皇入宮百官移班殿門外宣詔畢入班殿庭頃之
皇太子服袍履內侍扶掖至御榻前拱手側立不坐奉
應官以次稱賀內侍扶掖至于七八乃畧就坐宰相率
百寮稱賀上遽興康伯等陞殿奏願陛下即御座正南
面以副太上皇付託之意上愀然曰君父之命出于獨
斷然此大位懼不克當尚容辭避班退太上皇帝即日
駕之德壽宮上服赭袍玉帶步出祥曦殿門冒雨掖輦
以行及宮門弗肯止上皇麾謝再三且令左右扶掖以

還顧曰吾付託得人斯無憾矣左右皆呼萬歲

玉牒

百官

扈從上皇至德壽宮而歸頃之太上皇后赴德壽宮

晁公

遡箕山日記

詔太上皇帝太上皇后合上尊號令有司集議

以聞在內諸司日輪官吏赴德壽宮應奉少有怠慢以

大不恭論德壽宮宿衛依皇城門及宮門法

實錄

自是二

十六年之間國勢尊安海內康樂孝愛兩盡今古鮮倫

唐人所謂一月三朝大明天子之孝問安視膳不改家

人之禮者蓋實錄也廟號孝宗不亦宜哉

建炎雜記乙集卷一

欽定四庫全書

建炎雜記乙集卷二

宋 李心傳 撰

上德二

已酉傳位錄

光宗皇帝以藩王越繼大統蓋阜陵為天下慮而不私其子因虞允文為相贊成之上意密決大議世或未之知也先是隆興初張浚為江淮宣撫使首上䟽援漢

故事乞立太子孝宗方有兵革之事且謙遜未遑也始
孝宗在藩邸成穆郭后生四男長鄧王愔次慶王愷次
恭王即上也次未命而歿追賜名恪贈使相封邵王乾
道元年六月鄧王夫人錢氏生子太上甚喜先兩月恭
王亦生子於是秘書少監兼恭王府直講王淮攜白劄
子見大臣言恭王夫人李氏四月十五日生皇長嫡孫
時孝宗未置相參知政事錢端禮行丞相事端禮鄧王
夫人之父也見之不悅明日進呈乞令禮部太常寺檢

會合行典禮孝宗曰不合稱嫡孫只合稱皇孫端禮曰
此月三日早鄧王府先申誕皇嫡孫是晚恭王府方申
到文書孝宗曰朕知之見鄧王府申後恭王府方申今
就十二日奏告更不須差官端禮曰嫡庶俱載禮經所
以別嫌疑明是非定猶豫孝宗曰家重嫡正謂此端禮
曰初二日詣德壽宮太上皇帝宣諭皇嫡孫生而與他
事不同此皆主上聖孝所招卿須當行賀禮臣遂具奏
上表於初五日稱賀昨日王淮來見臣出白劄子及稱

年鈞以長義鈞擇賢孝宗曰此是何語皆非所宜言虞允文時為參知政事亦奏曰祭不入支庶之家可見聖人制禮之意講讀官當以正論輔道不應為此邪僻之說孝宗曰豈不啟邪心當行黜責端禮奏與外任放謝辭孝宗令批旨具載本末乃詔王淮傾邪不正違禮經可與外任乃放謝辭

三省時政記

八月遂立鄧王為皇太子

明年七月詔皇太子男皇嫡孫賜名挺除福州觀察使封榮國公恭王男皇孫賜名挺除左千牛衛大將軍又

明年七月太子薨諡莊文四年太子小祥五年大祥皆命輔臣就東宮行禮六年五月允文獨相六月遂以知樞密院府為莊文太子外第命榮國公與錢妃自東宮徙居焉先是正月戊戌大雨震電庚辰大雨雪陳良翰時為左諫議大夫以東宮久未建手疏言之孝宗嘉納

良翰
行狀

左相陳俊卿之未去也有議皇孫出外者俊卿為

秘書監李壽言之壽出梁昭明傳示俊卿俊卿愕然而止及是復申前議著作左郎劉惇見允文語及之允文曰君

見上及此但道家事勿問外人燭曰徐勣此言豈可效

耶

晁公邁
日記

其實允文將與孝宗謀建儲也七月台州進

士鄭偉上書亦及春坊事允文薦於孝宗召見補左迪

功郎

晁公邁日記云往年偉已有肯命官梁叔子在瑣
闥激之而止至是介於王抃抃見右相使偉俟于

客位俄延之八今日引見命以官邁所記如此而實
錄會要及龔頤正持命錄皆無之疑不作錄黃故也是

月二十七日乙巳太史奏是夜四更後東北方火星順

行在木星西南入宿各不及一度占云木火合宿主太

子當有赦八月三日庚戌孝宗御垂拱殿允文乞留班

奏事三省樞密院進呈文字訖執政下殿允文方欲有所奏孝宗宣諭云祈請陵寢使赴金彼中已遣使來接取近又報遣赫舍哩志寧來汴京此意如何允文奏云甲申江上之盟志寧主之金以泛使來未知為何事不免疑我渝盟爾若知我以陵寢為問志寧必先回燕蓋待我使至決議當在金庭也孝宗又云金中簽發兩河人及生女真必以為戰用在今日宜每事蚤定先為不可勝以待之卿且留意允文奏云臣累日齋戒齊心今

日涓吉有一大事方欲犯雷霆之威冒萬死以請孝宗云何事允文奏云自古人君即位一二年後必建立儲貳以隆萬世之統以係四海之心國家治亂安危之機無大於此故曰太子國之本也國本正而萬事理況今日聖志已定將大有為於天下若一旦金人敗盟連兵兩淮六飛必須順動監國撫軍誰任其責臨事之變倉卒議之當有不如人意處又陛下在位將十年而元良虛位中外士夫共懷憂疑但往往畏死不敢啟白開陳

爾臣蒙陛下大恩付以心腹之託使定大計今日之事
無大於此無急於此日者水火合宿太史奏以為當冊
太子此天心仁愛陛下所以昭示休祥願陛下上順天
心下從人望蚤出睿斷孝宗欣然云朕久有此意事亦
素定但恐儲位既正人性易驕便自縱逸不勤於學浸
有失德不可不慮朕更令歷練世務通知古今庶幾無
後悔爾允文奏云臣平日竊觀陛下聖孝至篤豈不以
宗社為念聖慮最遠豈不以儲副為急所以遲遲至今亦

必有說今蒙宣諭益有以見陛下重惜神器封植國本
為萬年之永圖天下幸甚然臣之愚以為此事不過審
擇官官使日聞正言日行正道真積力久自然無不趣
于正安得有後悔又儲闈一開深居禁中常得在陛下
左右日親帝學何患不光明日與朝政何患不歷練以
臣之愚謂早建儲宮其所成就必遠過於外處潛邸孝
宗曰丞相言之最是但此事却有些遷次非久於選德
獨與丞相議之允文即奏云臣以愚忠所迫昧死有請

敢意陛下遽使察納臣無任感天荷聖之至容臣再拜
謝恩拜訖復奏云此事願陛下早留聖念孝宗云甚好
甚好不過旬日間二十五日壬申早朝殿前奏事至下
馬處中使傳旨令右相留班孝宗以邊事一二宣諭已
奏對訖允文奏云臣比者敢以早建東宮事有請陛下
欣然即賜開納今已踰旬日未准處分臣實憂懼孝宗
曰此事已決偶數日來事多未及與卿商量允文奏云
昔唐太宗從容謂侍臣曰當今國家何事最急各為我

言之高士廉曰養百姓最急劉洎曰撫四夷最急岑文本曰行禮義最急獨褚遂良云今四方仰德誰敢為非但太子諸王須有定分陛下宜為萬代法以遺子孫太宗答曰此言是也朕年將五十心常憂慮願在此耳臣仰惟陛下日月之明於唐君之言是非去取必有所擇臣竊按唐太宗與侍臣言在貞觀十六年太子承乾已立遂良但以嫡庶名分未正其言如此今日之事臣之所憂有甚於遂良但不敢盡言爾孝宗云朕志已定正欲

與丞相議之朕見唐太宗用兵取天下心甚敬之至議立太子乃引佩刀自決亦未嘗不笑之而處置家事何用如此今秋事向晚冬初金使來又有一番禮數若於郊禮時或前或後降指揮如何允丈奏云聖志果定以郊天慶成日降指揮甚好蓋日南至天正也孝宗云當用此日十一月五日辛巳大駕至郊壇齋於青城是日午有旨宰執奏事既至青城門下馬處又有旨令右相留班孝宗宣諭云立太子事朕但欲與丞相議如何爾

允文奏曰此陛下家事臣不當與臣不敢遠引漢唐以
譬今日臣記得本朝太宗皇帝即位之後以議立太子
事大臣有竄黜過嶺者自後無敢復言至淳化末年足
瘡召寇準於青州既入對太宗曰卿來何遲準對曰臣
守藩在遠非賜召臣無緣以望清光太宗曰東宮未立
如何準對曰此事問內人不可問大臣亦不可問中貴
人更不可惟陛下獨斷乃可爾太宗曰襄王可乎準對
曰知子莫若父陛下若以為可願早降處分乃立真宗

臣嘗讀國史太宗八子真宗為第三觀準所對曲折之間但欲太宗自發之爾太宗乾斷一發千百世無有議之者此臣惓惓之忠獨有望于陛下也孝宗云此事無可疑今郊天後先欲與卿商量加上兩宮尊號立太子可用春初亦未晚否允文奏云陛下即大位九年三見上帝前兩郊有意外相妨事昨日宿太廟大雨不止羣心憂疑夜半行事時中天星氣炳然百執事駿奔中庭皆如禮數咸謂陛下聖德有以感召今日霽色如此熙

事必成陛下欲歸美兩宮益隆徽譽此千載希有之慶
臣敢再拜已而奏云陛下欲以春初立太子臣謹奉詔
是時願陛下更無改易孝宗云只俟兩宮禮畢便降旨
揮又微笑云朕家好事數件皆是丞相做了允文頓首
謝又奏云二事淵衷素定睿斷必行臣但贊嘆奉行而
已辛卯正月一日丙子朔太上皇帝壽聖皇后受冊寶
禮畢五日庚辰允文奏事紫宸殿後幄乞留班奏云去
年郊天前一日臣賜對郊宮寢殿蒙陛下宣諭少俟兩

宮尊號禮畢便降立太子指揮今兩宮冊寶慶成乞早
賜處分孝宗曰丞相留意此事如此朕欲以中春上旬
擇日行禮非久於內殿更與卿議之又有少說朕立太
子後餘一親王便欲令出鎮外藩不知本朝有何典故
允文奏曰陛下止有兩大王若立王為太子一王自留
王邸侍陛下左右本朝亦無似此典故孝宗云朕之慮
甚遠卿可於唐以前子細密加討論別一日進呈允文
奉旨而退

自七月二十七日太史奏云云以後並允文手記

十四日戊子進呈

此一日所奏最緊要允文手記乃缺之甚可惜也

二十四日戊戌允文擬進立

太子御劄

晁公遡箕山日記云高子長正月未離臨安李道之子宣贊範者託語其父云三大王言

丞相遣腹心來報儲議已定允文差遣可無慮後旬日建儲詔下考尋諸書子長名祚此時以右朝請郎為四川宣撫司主管機宜文字自荆南前去之任道恭王夫人之父此時為湖北副總管二月七日壬

子晚朝孝宗御選德殿始以立皇太子御劄宣示大臣

允文奏元良天下之本陛下獨出睿斷為天下得人各

再拜賀孝宗曰前世人主多以此為諱朕甚不取國有

儲副自古皆然何諱之有允文曰唐太宗號英主至此

乃不能決猶引佩刀以自向孝宗曰朕常笑之雉奴仁
懦太宗既知之矣卒不能奪以基禍亂皇太子朕觀之
熟矣他日親馭戎輅以撫六師監國之任不及今早定
何以繫天下人心允文奏臣等受詔未敢即行恭俟來
日集百官宣布孝宗曰善是夕鎖學士院命直院鄭聞
草皇太子及慶王加封兩制八日癸丑百官班集文德
殿詔曰朕紹承大統于今十年深惟太上皇帝付託之
重而元良虛位惕然于懷傳曰儲副天下公器朕其敢

有所私哉第三子

御名

仁孝嚴重積有常德學必以正譽

日以休繫自朕心俾膺主鬯以永宗社之慶可立為皇

太子其官屬儀物制度令有司討論典禮以聞爾中外

體予至懷

虞允文擬詔手藁同此但擬云本皇子某御札改云第三子某擬本云深體至懷御札改

云體予至懷擬本云如改賜名即書云改賜名某御札不改

宣詔畢內出麻制皇帝

第三子恭王惇立為皇太子皇子授雄武軍節度使開

府儀同三司慶王愷特授雄武保寧軍節度使判寧國

府進封魏王三月四日戊寅命宰執燕餞魏王于玉津

園用文彥博故事也王登車顧允文曰更望相公保全

晁公遡箕山日記云耳公遡時自尚書而除潼川運副

二十三日丁酉太子受冊

四月二十日甲子御劄皇太子判臨安府二十二日丁

卯將瑣院或疑宣麻給告非待儲貳之體二十四日已

已後省官及禮官會議于史院二十五日庚午御筆皇

太子某官領臨安尹命直院周必大草制必大具奏二

十六日辛未告延畢別錄本賜皇太子九年二月榮國

公薨四月皇太子解尹事淳熙元年十月魏王改判明

州七年二月薨遺表上孝宗泣然流涕謂右丞相趙雄
曰朕向來所以越次建儲者正謂此子福氣稍薄耳然
亦不料其如此之夭壽也即葬會稽謚惠憲他日又謂
雄曰太子資質極美但尚少學問耳每遣人來問安朕
必戒之云且語太子切須留意學問十四年十月太上
皇帝崩於是孝宗已有禪意十一月二日己亥百官大
祥是日手詔皇太子可令參決庶務先旬日孝宗獨召
學士洪邁入對謂曰朕將行內禪且欲如唐貞觀故事

令皇太子參決如何邁言天禧資善堂典禮必大奏天禧時仁廟尚幼始見輔臣恐不可用西晉有宣猷堂今作議事堂可也十五年正月二日戊戌必大請孝宗特御延和殿令宰執奉事畢然後過堂議事

李壁作必大行狀云爾先

是有詔東內門司改作議事堂皇太子隔日與宰執公裳係鞋相見議事如有差等擢在內館職在外部刺史以上乃以聞除諸郡守臣係侍從及文臣監司武臣鈐轄外並於議事堂參辭納劄子其可行者皇太子同宰

執將上取旨九月乙巳又詔每遇朝殿令皇太子侍立於是太常少卿兼左諭德尤袤獻書于太子曰大權所在天下之所爭趨甚可懼也願殿下事無大小一取上旨而後行情無厚薄一付衆議而後定又曰利害之端常伏於思慮之所不到疑問之萌每開於隄防之所不及儲副之位止於侍膳問安不交外事撫軍監國自漢至今多出權宜事權不一動有觸礙乞侯祔廟之後便行懇辭以彰殿下之令德太子覽書褒嘆曰諭德可謂

見愛之深矣三月永思陵既掩殯五月左丞相王淮罷
周必大獨相十一月四日必大乞去位孝宗諭以此年
病倦欲傳位太子卿須少留必大云聖體康寧止因孝
思稍過豈應遽爾倦勤孝宗曰禮莫大於宗廟而不得
孟享多以病而分詣孝莫大於執喪而不得日至德壽
宮欲不退休得乎朕方以此委卿會陳康伯家以紹興
傳位親劄來上十二月十一日壬申孝宗遣中使密持
賜必大因令留身討論典禮初議賀正旦北使出門即

擇日傳授偶太史局言二月旦太陽蝕九分辛卯除夕
必大留身密奏云太子聽政挾旬不應便講避殿之禮
可少展否孝宗大以為然曰朕亦可以當災遂定仲春
壬戌之吉又命必大草詔專以奉几筵侍東朝為意十
六年正月三日甲午皇孫柄為耀州觀察使封嘉國公
柄惠憲王子也時皇太子之子已先拜節度使封平陽
郡王矣八月己亥遂進必大左丞相而留正越次拜右
丞相王藺葛邲並自尚書擢為執政執政官黃洽蕭燧

皆相繼罷十五日丙午皇太后遷慈福宮春坊姜特立見必大問曰宮中人人知上元後舉行典禮今悄然何也必大謝曰此非外庭所敢與聞特立不悅而退

必大自記

此事具云意間言或自此入但以火月未則誤也當在上宣諭二府之前

會學士李巖以草

制失指得罪乃命禮部侍郎尤袤直學士院時內禪有定議孝宗未以諭近臣而已喧傳袤因言及敵中事孝宗感慨良久諭袤曰旦夕制策甚多非卿孰能為者故處卿以文字之職二十日辛亥二府奏事孝宗始諭曰

朕年來稍覺倦勤旬日間傳位于皇太子退就休養以
畢高宗三年之制有合施行事卿等可一面理會進呈

因令必大留身草詔

李必大作必大行狀以為壬子
日事實錄乃在辛亥今從之

二

十八日己未詔德壽宮改為重華宮二月二日壬戌孝

宗吉服御紫宸殿有司立仗百官起居舞蹈宰執奏事

畢駕興百官移班殿門外內降詔曰朕以菲質循堯之

道統業萬機歷歲彌長賴兩儀九廟之德邇鄙不聳年

穀順成底于小康爰自宅憂以來勉親聽斷不得日奉

先帝之几筵躬行聖母之定省固已慊然于懷况乎春
秋寢高思釋重負皇太子惇仁孝聰哲久司七鬯軍國
之務歷試參決宜付大寶撫綏萬邦俾予一人獲遂事
親之心永膺天下之養不亦美歟皇太子可即皇帝位
朕移御重華宮

周必大政府應制藁同此但
移御上有當自御劄無之

宣詔訖百

官入班殿庭皇太子即皇帝位側立不坐如紹興三十
二年之禮百官稱賀畢三省樞密院奏事退放仗孝宗
御便殿新皇帝侍立繼登輦同詣重華宮新皇帝還內

即下詔書上尊號曰至尊壽皇聖帝

加上光宗尊諡

嘉泰三年秋七月癸未詔加上光宗憲仁聖哲慈孝皇帝尊諡為十六字自商周以來人主始有諡大抵節以一惠而已間亦有用二字者如商之成湯周之貞定是也嗣後歷漢魏迄唐初皆然至高宗改諡太宗為文武聖皇帝始用三字天寶末又例加至七字逮玄宗肅宗之殞遂皆以九字易名而益非古矣代宗德宗初諡皆

四字順宗增為六字憲宗又損為五字自是終唐之世
皆因之惟宣宗以復河湟功增順宗憲宗為九字其餘
則否五代朱梁初諡亦五字唐明宗六字晉漢周皆七
字周世宗四字本廟初諡亦六字大中祥符元年始增
祖宗諡為十四字五年又增二字十六字之諡自此始
矣真宗初加為八字再為十六字仁宗以後初加即十
六字惟仁宗累加至二十字而欽宗之諡無加焉此其
所以異也詔下之九日壬辰宰執侍從兩省臺諫禮官

即議于尚書省請加諡曰循道憲仁明功茂德溫文順
武聖哲慈孝皇帝詔恭依其年十一月日至上祀南
郊前一日親帥羣臣奉上玉冊于太廟本室如故事

成肅謝皇后

永思陵既復土壽皇欲迎憲聖還居大內而憲聖以為
上皇享天下之養優游二十餘載升遐此宮何忍遽然
遷去今几筵又復安奉于此倘欲還內當俟終制乃命
有司改築本殿為慈福宮就居之故內禪詔書首言躬

行聖母之定省蓋以此也及壽皇升遐憲聖壽成二太后當還內而壽康宮已在南內矣乃改重華宮為慈福宮以舊慈福為重壽殿二太后皆徙居焉比憲聖終喪又改慈福宮為壽慈以奉太母光宗撤几筵上復請太母還內而太母以為久居此宮凡百安便況以年尊不欲遷移上乃以慈訓諭中外時嘉泰二年九月也其年十月上尊號曰壽成惠聖慈祐太皇太后以十二月甲戌奉上冊寶開禧二年春二月二日癸丑夜壽慈宮前

殿火逮曉始息於是太皇太后復歸大內三日甲寅詔
壽慈宮遺火由朕涼德以至回祿為災而驚慈闈可自
初四日撤樂避正殿又詔已迎請太皇太后過內中朕
連日奏請乞必須還宮庶便晨昏之奉已蒙俞允是日
太皇太后有旨一行物色並撤絮前來賜救火官兵錢
七萬貫五日丙辰正侍大夫安慶軍承宣使壽慈宮提舉
吳玘等三人各降二級官以遺火自効也七日戊午太
皇太后聖旨見勘本宮遺火一行人並免根究日下踈

故今提舉所具名姓取旨行遣殿中侍御史徐杓奏內
史王溶等三人各降一官罷壽慈宮職事尋又詔本宮
官吏並特轉一官八日己未權殿前司公事郭杲步軍
都虞候王處久及二司統制官五員各特轉一官以救
火之勞也三年五月太皇太后有疾卒郊崩謚成肅是日
赦天下后母儀天下三世正位凡三十有二年弟淵官
至少傅保順軍節度使賜玉帶后崩遺命賜淵錢十萬
緡金二千兩田十頃僦緡十千焉

今上楊皇后

今上楊皇后遂安人也少入慈福宮性淑婉憲聖慈烈
皇后甚愛之初封郡夫人慶元三年進婕妤姓楊氏又
進貴妃嘉泰二年十二月甲申立為皇后學士傅伯壽
草制有曰洪惟文母念我神孫美其冠于後庭禪之見
于丙殿蓋紀其實也后知書史通古今兄次山本右學
生慶元間為帶御器械累遷太尉岳陽軍節度使韓侂
胄死拜開府儀同三司賜玉帶嘉定三年夏拜少保封

永陽郡王制書有負掩前聞之語蓋殊命也次山能遠避權勢不與人事論者以為得外戚之體子谷石皆為承宣使

皇太子

皇太子藝祖皇帝十世孫也燕懿皇之後初名與愿慶元四年育于宮中時年六歲六年冬用故事賜名曦除福州觀察使嘉泰二年閏十二月拜威武軍節度使封衛國公聽讀資善堂以右內府副使于詵充伴讀開府

儀同三司封榮王三年十一月戊子立為皇太子更名
壽嘉定元年四月甲寅詔宰執日赴資善堂會議遇朝
殿令皇太子侍立閏月丁亥太子出居東宮年十六矣
議者以壽字難避二年八月甲申又更名詢自太子侍
立而宰輔大臣並兼師傅賓客蓋用天禧間故事

華冲穆王

華冲穆王坦上第五子也母曰楊皇后嘉泰四年冬生
未踰月薨嘉定二年冬追賜名贈太師尚書令命有司

改葬故事後宮正一品生皇子得奏補其班行二名至是乃增為四名蓋重其禮也后辭詔葬許之

申冲懿王

申冲懿王塢上第六子也開禧三年正月生尋不育三月追賜名贈太師尚書令仍加封諡云

順冲懷王

順冲懷王圻上第七子也母曰鍾夫人開禧三年正月丁亥夜生於宮中始夫人生二子其一丑時不育而圻

丑末也二月己未詔禮部討論合行典禮禮官請用熙寧九年故事奏告天地宗廟社稷高禩諸陵攢宮太師宰臣率百寮拜表稱賀從之後旬日皇子薨輟朝三日追賜名贈太師甲戌出殯

肅冲昭王

肅冲昭王垧上第八子也嘉定元年生閏四月薨追賜名贈太師尚書令加封謚侍中倪思言皇子以師傳名官於義未安乃止贈尚書令

沂靖惠王

吳興郡王柄以開禧二年五月薨上臨奠輟視朝二日
贈太保追封沂王謚靖惠王性早慧然體羸多疾上友睦
甚至及病侍醫每製藥必先以方書取旨而後進于王
其親愛如此王子垓早夭均嘉定初賜名補右監門衛
將軍左遷福州觀察使出就外傳擇卿監館職二員兼
教授七年更名貴和上待近屬甚恩前代所不及安德
軍承宣使思正莊文太子繼嗣也光宗賜名措補右千

牛衛將軍開禧初除永州防禦使奉朝請遷福州觀察使上立太子加恩遷承宣使七年更今名

初國公主

初國公主上女也嘉定元年生六月薨追封



建炎雜記乙集卷二

欽定四庫全書

史部

建炎雜記乙集卷三

四

詳校官編修臣范來宗

編修臣程嘉謨覆勘

總校官編修臣王燕緒

校對官助教臣卜維吉

謄錄監生臣戴典

欽定四庫全書

建炎雜記乙集卷三

宋 李心傳 撰

上德三

高宗屬意李忠定

靖康末高宗皇帝在山東與李忠定公書構頓首清署
伏惟鈞候萬福久違瞻謁王室多故金人連歲侵逼中
國詔書已再講和所以嚴戢兵鋒豈謂天禍大宋乘輿

蒙塵聞之心焉如割已令會兵追擊興遂奉迎而歸方
今生民之命急於倒垂諒非不世之才何以協濟事功
閣下學究天人忠貫金石用是復公舊職澤被斯人功
垂竹帛乃公素志想投袂而起以之振溺而副蒼生之
望所祝道中倍加保衛謹啟構頓首伯紀樞密院觀文
之後知此書則高宗屬意於忠定者可見矣端為汪黃
所擠纔七十五日而去位此亦天意未欲恢復也惜夫

高宗與宗忠簡書

高宗皇帝與宗忠簡公諸帥等書構去歲使敵營中道
撤行所攜不過千人閏月被命帥師集東北民兵進未
及戰已承再和之詔繼得礮書又戒生事且方忌器未
敢輕舉但分屯近畿為逼逐之計閱日既久刺知敵情
不免督兵前進繼聞領兵戡難感涕交頤即具公文當
已呈達今聞大臣之在敵中者日久分深承其付託而
二聖二后青宮諸王北渡大河五內殞裂不如無生便
欲身先士卒手刃仇讐身膏草野以救君父而僚屬不

容謂祖宗德澤主上仁聖臣民歸戴天意未改故老近
臣將帥軍民忠義有素當資衆力共成忠孝本意除已
具公文外伏望鼓作士氣開曉士心奉迎君父永安社
稷以成不世之勲朕不任痛憤泣血懇切之情所有受
敵付託之人義當征誅然聞二聖之在郊已膺僭偽慮
百計之謀國或出權宜未當輕動徒使京城重擾軍民
被害故欲按甲近城容構移書問故得其情實即時關
報施行未免今日之事非左右戮力造次在念恐不能

濟伏望孚察未轉會間尚冀努為宗社所賴倍加保重不
宣書後復書云近有尚書省劄子於濟鄆間訪求行府
語意無他尤宜謹重作嚴備也此書宋公遺事中摘其
大略欽錄亦不全載故具錄之

宰執恭謝德壽重華宮聖語

故事宰輔大臣除拜皆恭謝景靈宮自紹興壬午以來
又恭謝于北內蓋德壽重華雖不以事物嬰心而為子
孫得人之意則未嘗替也故凡登進士臣亦必奏稟上

皇而後出命隆興初湯進之為右僕射上欲相張魏公而難於左右因過宮稟上皇上皇云各還其舊蓋魏公在紹興初纔為右相而進之紹興末年已為左相故也後五日鎖院進之轉左僕射魏公拜右僕射隆興二年春魏公行邊張安國以中書舍人從辟為都督府參贊軍事魏公入辭上皇與論事甚久因問曰張孝詳想不知兵蓋安國儒生晚出未諳軍旅故也於是安國旋亦罷黜乾道元年夏洪景伯除簽書樞密院事入謝上皇曰

上議用卿吾謂從官中無踰卿者况卿父精忠古今所
無頃欲登用阻於秦檜今卿兄弟相繼入輔此天報也
三年夏虞雍公知樞密院事上皇曰聞兒子極稱道卿
溫叔奏陛下可謂為天下得人上皇曰余在位三十年
無他過人自謂晚年此一節差可矣紹興四年春樞府
有闕壽皇欲用趙忠定既出命矣而寮官有言高宗聖
訓不用宗室為宰執者上謀之壽皇遂命宰執召當筆
學士申諭聖意謂高宗聖訓本以折秦檜之姦謀故答

詔有云若乃紹興之故實因有為而言況我壽皇之疇
咨欲播告於衆蓋為是也是時大臣恭謝者多不得對
壽皇欲見忠定乃因葛楚輔胡子遠陳晋叔入謝相繼
宣引後二十餘日忠定始入謝壽皇曰卿以宗室之賢
為執政乃國家之盛事卿在蜀時所進奏議甚善朕常
觀此書可與資治通鑑並行蓋指續通鑑自壬午迄今癸丑
三十餘年大臣得聞兩宮聖訓者多矣今姑記所聞者
如此以示後世

孝宗與近臣論德仁功利

乾道辛卯八月六日戊申上召吏部侍郎王之奇能甫
太子詹事陳良翰邦彥禮部侍郎直學士院周必大子充
同對選德殿賜坐從容訪以治道久之袖出御筆一通
首以魏徵答唐太宗德仁功利之問而繼書其後曰朕
即位以來于今十年功則未能有成至於安養黎元俾遂
生業政今日之急務朕未嘗不以此為自治之良策
然所行優劣亦苦不自知卿各極陳其當否凡有未至

悲情毋隱若夫仁德帝王之高致朕亦不敢自居方以
魏徵之言為龜鑑耳能甫等退詣政事堂以所被御筆
示宰執後八日丙辰後殿奏事上以問大臣右相虞公并
奏此四者當兼修而並用然仁德之責在已功利之責
在人亦不可不察於是邦彥退而奏疏曰仁德者治之
本也功利者治之效也大有為之君務其本而效自至
未有無其本而有其效者也陛下覽觀古事親御神筆
深詔愚臣以求今日所未至此者誠堯舜之心也臣敢

無辭以對臣竊觀陛下欲承天意而比年以來水旱間作數千里之間流殍萬計是所以承天意者未至也陛下欲結民心而營造寨屋民不聊生死亡凍餒者不知其幾是所以結民心者未至也陛下欲任賢能而張栻一言遽從外補正直之氣鬱而不伸是所以任賢能者未至也陛下欲退小人而正志方逐張松繼之張松適罷韓至又進是所以退小人者未至也至於欲擇將帥而內外諸軍剝士卒專事結交不修軍政欲卹軍情

而移戍江淮措置失當使老幼狼狽失所欲擇監司而以祥刑之寄付之武臣欲吏久任而或到官旬日即行改易凡此八者一有未至則於陛下深仁厚德不為無累臣恐功利之未可至也願陛下無以仁德為難而忘為治之本無以功利為易而速為治之效欽崇奉若以承天意哀矜惻怛以結民心任君子必盡其才退小人必絕其本廣搜智略以司閭外之權作成武勇以振三軍之氣罷監司之非人申久任之良法自然仁德昭著

功利烜赫將與唐虞比隆而視太宗之事有不足為者
矣子充之奏練兵以圖恢復而用將之道未盡擇人以
守郡國而責實之方未至又指陳江池大將二浙郡守
數易之弊後四日庚申上復遣中使持三從官奏牘以
示宰執能甫所奏未見虞雍公復奏今日之務莫急於論相必擇
之於未用之前信之於既用之後不使議論負荷者歧
而為二則是非自定利害自明重輕相促之勢不分毀
譽亂真之禍不作德仁功利之用次第而施行之萬事

將無不理矣蓋邦彥所對皆指陳時政之失故虞公有是言劉文孺時為禮部尚書上亦嘗以是為問而未聞有所規諫也邦彥尋以足疾求去其冬十二月除雜學士在外宮觀明年春二月能甫除簽書樞密院事云

孝宗論不宜有清議

龔實之沈持要
周子充論奏附

淳熙乙未歲夏五月之十五日庚寅有旨來日曲宴宰執於觀政堂辛卯以雨改就澄碧軒中燕上謂大臣曰朝廷用人止可論其賢否如何不當有黨如唐之牛李

其黨相攻垂四十年不解皆緣主聽不明所以至此文
宗乃言去河北賊易去朝中朋黨難朕常笑之為人主
者但公是公非何緣為黨耶上再坐羣臣起奉觴為壽
上曰朝廷所行事或是或非自有公議近來士大夫又
好唱為清議之說不宜有此此語一出恐相搆成風便
以趨利赴功者為猥俗以矯激沾譽者為清高浸浸不
已如東漢杜喬之徒激成黨錮之禍殆皆由此可不痛
為之戒況今公道大開朝政每有缺失雖民間亦得論

之何必更言清議龔實之曰天下有道則庶人不議惟公道不行于上然後清議在下此衰世氣象豈是好事李秀叔曰惟有是非故人得而議之若朝廷所行皆是自無可議上曰若有不是處在上之人而與公卿却當反求諸已不可更為清議之說卿等可書諸紳實之曰唐末白馬之禍害及縉紳至有清流濁流之說惟大中至正之道可以常行上曰朕常日所行乃執其兩端用其中於民葉夢錫丞相以下皆拜上曰更飲一盃卿等可

以將清議之說宣諭從班而下使之皆知沈持要時為
權吏部侍郎兼太子詹事即上章稱頌聖語乞發為明
詔布之海內上從之其月二十八日戊申也實之奏風
俗自朝廷出今所得聖語已宣示外廷恐不須更詔郡
國六月十三日壬戌侍講周子充對後殿奏論執政聽
聞不審誤以杜密為杜喬又所引唐末清流濁流之說
不相類乞從中刪改行出尋命刪改執行而清濁流之
說猶如故也持要用此除太子詹事兼吏部侍郎

六月

二日 辛亥 其九月帝錫罷政持要亦坐分析欺隱降三官送

筠州居住

孝宗論士大夫微有西晉風

孝宗初立勵精庶政至於財用大計尤所經心或時呼版曹吏入禁中驅磨財賦諸庫皆有簿書多有按視乾道元年冬洪景伯為相因進呈戶部文字上曰朕見今人監戶部吏具歲入名件較之歲出第欠三百萬緡若行那移亦可足用景伯曰臣今方欲如此開具上曰丈

字將畢不須復爾明年春金部郎官呂措罷景伯奏以
何資深為之上曰恐逢原儒者不肯留意金穀事如呂
措問簿籍皆不知卿等宣諭逢原留意職事二年秋司
農少卿闕魏南夫子禮奏以莫子濟為之因言有一事
須合奏知莫子濟嘗中祠科今掌南宮箋奏恐議者
以謂蹊徑未提上曰中都官初不清濁如司農責任
亦甚重於士人中除授亦無害也淳熙四年夏樞密院
王季海趙溫叔因進呈奏淮北近苦蝗此地仍歲豐稔

上曰今夏蠶麥甚熟絲及米價極賤此甚可喜奏曰孟子論王道必始於黎民不飢不寒上曰近世士大夫多恥言農事夫農事乃國之根本士大夫好為高論而不務實却恥言之奏曰士大夫好高論豈能過孟子孟子之言必曰五畝之宅樹之以桑百畝之田勿奪其時所見諸侯未嘗離此數語上曰今士大夫微有西晉之風作王衍阿堵等語豈知周禮言理財易言理財周公孔子未嘗不以理財為務奏曰捨周公孔子孟子不學而

學王衍士大夫之有見識者必不至此曩時虛名之俗誠勢太甚自陛下行總覈名實之政身化臣下頃年以來士風為之一變三館兩學之士出為郡守監使無不留意財計往往皆有能聲此聖主貴實之效上曰然近年亦稍變猶有未盡且不獨此耳士大夫諱言恢復不知其家有田百畝內五十畝為人所強占亦投牒理索否士大夫於家事則人人甚理會得至於國事則諱言之奏曰陛下志在大有為故深思遠慮如此臣等敢

不罄竭忠力上曰卿等見士大夫可與道朕此語奏曰

敢不廣布堯言溫叔退而書之時政記

自今夏蠶麥以後並溫叔所進

淳熙四年五月二十五日甲子時政記本文具答詞類溫叔語但王季海為同知位在其上故以臣淮等為文耳

原道辨易三教論

淳熙中壽皇嘗作原道辨大略謂三教本不相遠特所施不同至其末流昧者執之而自為異耳以佛修心以道養生以儒治世可也又何憾焉文成遣直殿甘昺持

示史文惠史公時再免相待經席也史公奏曰臣惟韓
愈作是一篇唐人無不敬服本朝言道者亦莫之貶盖
其所主在帝王傳道宗乃萬世不易之論原其意在於
扶世立教所以人不敢議陛下聖學高明融會釋老使
之歸於儒宗末章乃欲以佛修心以道養生以儒治世
是本欲融會而自生分別也大學之道自物格知至而
至於天下平可以修心可以養生可以治世無所處而不
當矣又何假釋老之說耶陛下之議韓愈也望陛下稍

參定末章則善無以加矣程泰之時以刑部侍郎侍講席亦為上言之於是易三教論

孝宗論用人擇相

史文惠論忠厚豈有過

己亥之冬趙魏公為相薦劉後溪召試館職劉公答策論科場取士之道及進入上親批其後數百略曰用人之弊人君患在乏知人之哲寡於學而昧於道況又擇相不審至於懷姦私壞紀綱亂法度及貶而逐之不治之事也已不勝言矣宰相不能擇人每差一官則曰中

高第真好士人也終不考其才行何如國朝以來過於忠厚宰相而誤國者大將而敗軍師者未嘗誅戮之要在人君必審擇相相必為官擇人懋賞立乎前嚴誅設乎後人才不出吾不信也御筆既出中外大聳議者皆謂曾覲實與視草蓋劉公甲科及第故覲有宰相不能擇人之說也一日上遣覲持示史魏公史公奏曰唐虞之朝四凶極惡止於流竄而三攷之法不過黜陟幽明而已未嘗有誅戮之科也若甘誓嗣征所云乃為行師

用衆設耳蓋誅戮大臣乃秦漢法也漢之七代可稱治
主然見為雜霸不得進于三代此其大疵也我太祖皇
帝深以行一不義殺一不辜為戒而得天下制治以仁待
臣下以禮列聖相傳至仁宗而德化隆洽至於朝廷之
上恥言人過故本朝之治獨與三代同風此則祖宗之
家法也而聖訓則曰過於忠厚夫為國而底于忠厚豈
易得哉而豈過者哉臣恐議者以陛下欲行刻薄之政
而歸過祖宗此不可不審思也若必欲宣示于外乞改

其政一於忠厚尚庶幾焉史公為人重厚進說上前務存大體多所裨益此其尤粹也會丞相亦為上言宰相如司馬光恐非懋賞嚴誅能勉脅上悔乃改削其辭召從官宣示都堂仍付史館

元本今藏趙氏

孝宗善馭將

孝宗天資英武尤善馭將符離之潰大將李顯忠謫潭州既又籍其培尅軍資為緡錢四十萬遣大理寺丞一員往督之湯丞相請命版曹拘入上不許盡以分數給

還諸軍一毫無私焉顯忠晚年再典騎軍以病廢詔常俸外歲以上供米三千斛給之諸將中趙樽號為最廉乾道中樽罷軍政上諭虞丞相曰樽平生廉素朕已加錫賚以助其歸矣其抑揚多如此類至官爵亦然李顯忠邵宏淵取宿州顯忠超拜使相宏淵超拜節度使檢校少保及顯忠得罪宏淵又驟降為武功大夫時上嗣服之初而賞罰必行號令明肅繇是諸將咸服英斷矣

孝宗恭儉至貫朽

孝宗恭儉寡欲在位近三十年內帑與南庫之入專以奉兩宮備水旱其費不貲然其所積尚多也淳熙己亥夏中提領封樁庫所言抵四月中旬共管見錢五百三十萬貫年深有斷爛之數乞給工索之費穿排之用是時江上之積亦多而內府之金至於貫朽而不可校然未聞四方有橫賦也紹熙以後用度浸廣權姦秉國橫起兵端南北騷然耗矣

孝宗力行三年服

壽皇事高宗純孝備至丁未之秋高宗稍不豫至九月疾漸棘十月四日辛未大赦天下六日癸酉禱于天地宗廟社稷七日甲戌詔太上皇帝未御常膳乃依唐貞觀四年典禮自來日權不視朝宰執依時赴內殿奏事候安康復依舊又詔草澤能療治白身除節度使賜錢十萬貫田百頃八日乙亥早上皇大漸上詣德壽宮侍奉湯藥更不還內選內侍鄧從訓至漏舍諭大臣凡百事賴卿等仔細理會恐朕憂惱中或有差錯是日未刻

太上皇帝崩上號慟蹕踊初命早晚御膳減半進素既而不復取索九日丙子上猶未御素膳十一日戊寅大殮成服宰臣王淮等始得見上於素幄上號哭不自勝翰林學士洪邁乞廟號稱祖詔從之恩平郡王璩自會稽乞入臨喪而百官拜表乞還內不許時北敵賀生辰之使將至上欲不見而大臣恐北使為疑乃引明道二年三月章獻明肅皇后易日小祥既畢後二日仁宗衰服對契丹賀生辰使故事令侍從臺諫禮官議十三日庚辰吏部尚書蕭

燧等乞如明道故事二十三日就德壽宮素幄引見許之十四日辛巳上令中使諭王淮等欲不用易日之制如晉武帝魏孝文實行三年服自不妨聽政未刻淮等素幄奏事上嗚咽流涕諭曰司馬光通鑑所載甚詳淮等曰通鑑載晉武帝雖有此意後來止是深衣練冠上曰當時羣臣不能將順其美光所以譏之後來武帝竟欲行之淮等曰記得亦不能行上曰自我作古何害淮曰御殿之時人主衰經羣臣吉服可乎上曰自有等降淮等乞令有司討論奏事退上批示大行

太上皇帝奄棄至養朕當衰經三年羣臣自行易月之
令其合行儀制令有司討論又詔山陵百費並從內庫
支降右諫議大夫謝愕殿中丞冷光世監察御史吳傳
古共奏三日聽政雖有國朝典禮可稽至於還內典故
前所未有陛下一日躬行將為萬世法所繫至重望明
詔大臣少緩進表與禮官更加詳議從之十五日壬午
勅命所刪定禮官沈清臣上書乞俟梓宮發引日方還
大內又言今日喪禮與明肅皇后事體不侔望斷自淵

衷勿見金使凡六事是日大臣五上表乞還內聽政內
批勉從所請俟小祥畢還內設素幄奏事而金使卒不
見也十六日殿殯十七日甲申禮官顏師魯尤袤鄭僑
論廟號不當稱祖詔送集議所十八日乙酉詔百師於
以日易月之禮哀服之事奏聞二十日丁亥小祥上未
改服王淮等乞俯從禮制上流涕曰大恩難報情所未
忍俟別商量二十一日戊子車駕還內上衰經御輦設
素仗軍民見者往往感泣詔自今五日一詣梓宮前焚

香十七日甲午過宮以上皇升遐二七日自是七七皆如之是日上遣內侍張安仁諭宰執曰將來禪除行禮合用易服及羣臣上表請御殿朕以太上皇帝升遐纔踰月易服御殿情所未安今欲衰服素幄引輔臣及班次既而禮官奏謂苴麻三年難行於外庭奏入不出二十八日乙未王淮等言祥禪甚通乞付外施行知樞密院事施師典曰百日之制實不可行正擬正月金使朝見上曰朕自有所見少間批出欲稍救千餘年之弊宰執

退上批出曰覽卿等奏朕以太上皇帝升遐今方踰月
將來卿等請易服御殿情未遑處朕欲衰經素幄侯祔
廟畢然後行禫祥之禮以日易月乃近代權制朕所以
不忍也卿等可與禮官折衷以聞十一月戊戌朔禮官
顏師魯尤袤等乞大祥禮畢改服小祥之服去杖經禫
祭禮畢改服素紗軟脚折角巾淡黃袍黑銀帶神主祔
廟畢改服皂幘頭黑鞋犀帶遇燒香則於宮中衰經行
禮二十五日而除上批淡黃袍改服白袍二日己亥大

祥四日辛丑禪祭禮畢五日壬寅百官拜表請聽政六日癸卯批答不允八月乙巳百官三上表引康王之誥被冕服出應門等語為証九日丙午詔可自十八日內殿引輔臣及上殿班候過祔廟勉從所請十一日戊申勅令所刪定禮官沈清臣再上書願堅聽大事於內殿之旨將來祔廟畢日預降御筆截然示以終喪之志杜絕輔臣方來之章勿令再有奏請力全聖孝以示百官以型四海上納用焉二十三日庚申接行使言得神穴地段

於徽宗殯殿之西北十二月二十六日癸巳金之賀正
旦使入見上御垂拱殿東楹之素幄十五年正月十八
日甲寅百日上過宮行焚香禮二十一日丁巳上諭輔臣
曰昨內引洪邁見朕已過百日猶服衰麤因奏事應以
漸今宜服黔服如古人墨衰之義而巾則用繒或用羅
朕以用羅絹非是若用細布則可王淮等言尋常士大夫
丁憂過百日巾衫皆用細布出而見客則黔布今陛下
下舉千古不能行之禮為萬世之良法上又曰晚間引

宿直宿之類如何准等曰布巾布背子便是常服上以為
然自是每御延和殿止服白布折上巾白布袍黑銀帶禁
中則布巾布衫過宮則衰經而杖二月二十一日丁亥
金使入吊上衰經御德壽殿宮東廊之素幄宰執從官
如大祥之服衰經去杖三月十六日壬子起殯上服初
喪之服十八日甲寅發引三十日丙寅掩殯四月八日
甲戌上親行虞祭大臣言虞祭乃吉禮合用靴袍上曰
只用布折上巾黑帶布袍可也十八日甲申卒哭二十

日丙戌神主祔廟是日詔曰朕昨降指揮欲衰經三年緣羣臣屢請御殿易服故以布素視事內殿雖有過祔廟勉從所請詔稽諸典禮心實未安行之終制乃為近古宜體至意勿復有請於是大臣乃不敢言蓋三年之制斷自上心是時執政近臣皆主易月之議諫臣謝諤禮官尤袤心知其不可而弗敢盡言其贊上之決者勅局官一人而已舉千載廢墜之典破一朝淺薄之議廟號孝宗不亦宜哉

淳熙諒闇罷誕節正旦慶禮

壽皇居高廟之喪未改月而值會慶節時百官以故

事祝誕于明慶寺遂命緇徒徑行滿散百官免赴

十四年十月十

二巳時指揮

三省樞密院引明道二年明肅皇后升遐故事

欲上引見金國使人又以上在喪次歸而引見恐使以

為疑乞付侍從臺諫禮官商議蕭燧時以吏部尚書

為議首言今既罷百官上壽恐難以見使人如使人必

欲朝乞用小祥後二日就德壽宮素幄引見庶合明道

間典故大臣進呈既從之矣

十月十三日庚辰

後二日勅局刪

定官沈清臣正卿上疏言仁宗朝常遣使契丹遭彼有喪至柳河而還其主卒不見賀使也外國尚知有禮中原可不然耶況陛下居喪與明肅皇后事體不同望斷自淵衷勿牽羣議上大以為然遂命却其書幣就館津發金使感嘆而去繼而金之賀正旦使者繼至密院進呈次上問今在喪服中禮物當受與否施聖與留仲至同奏乞下禮官議既而禮事官言正旦禮物乃通好之儀

不可受鄭惠叔為起居舍人建言國有典故禮有經權
況引見於初到之時至於正旦之日陛下自行禮于大
行皇帝几筵之前朝會俱罷亦何名為慶哉上曰當諭
與館伴意度且令堅辭如是不從止令陳于殿門之外
庶幾於禮稍順乃詔曰今來正旦通問使專為和好故
設素幄許其入見若受禮物則有慶賀之嫌已令館伴
却而不受又慮使人援故事以為請未審于典禮如何
可令禮官詳議以聞既而禮官宇文字英价

兵部尚書
兼權尚書

顏魯字師魯

禮部侍郎

尤延之表

太常少卿

倪正父思

著作郎兼權郎官

黃元章

太常丞

張元善體仁

太常博士

言祖宗以來雖喪制未有

不引見來使亦無不受禮物之文前朝諸臣豈不知不當受而所以不免從權者謂既通好不當使之疑而生事也況元日俱罷初無賀儀幣物所以將書亦非慶禮萬一必欲如禮而去則徒為紛紛也在禮有反經而從權者正為是也臣等以為當受乃詔就殿之東楹設素幄引見使人曰今年會慶節若受諸軍進奉則有

慶賀之嫌宜可暫免二年宰相王季海曰此項錢幾六

十萬緡係屬戶部歲計上曰可用封樁庫錢償戶部

十

年正月九日乙巳其年金之賀使當至季海已去位右相周子

充疑之召禮官尤延之至都堂議延之請退而討論子

充以奏上曰敵國事亦不可單靠禮官運籌帷幄卿等

事也去歲生辰金使到朕方在哀疚之中不欲使人朝

見卿等更無主張朕堅執不與引見金使退聽子充愧

謝而已

七月九日癸卯

既而延之與奉常羅春伯合奏依正旦

例於垂拱殿東楹設淡黃幄引見仍用紹興三十年故

事移宴於館不用樂從之

九月十四日丁卯

節前一日內自降

旨文武百僚及使人並免賀止就東上閣門拜表起居
十六年會慶節上已移御重華宮百官詣宮拜表進香故
事皆不講後二日皇帝乃還宮焉

南北內

今南北內本杭州州治也紹興初創為之休兵後始作
崇政垂拱二殿久之又作天章等六閣

龍圖以下諸閣承平時並建于

大內之西今而寢殿仍舊謂之福寧殿淳熙初壽皇始此但一閣耳

作射殿謂之選德八年秋又改後殿擁舍為別殿取舊名謂之延和經歷兩朝如是而已至若苑中亭殿則皆太上為之壽皇亦稍增焉其名稱可見者僅有復古殿損齋觀堂芙蓉閣翠寒堂清華閣羅本堂隱岫澄碧倚桂隱秀碧琳堂之類蓋得先王卑宮室之意矣德壽乃秦丞相舊第也在大內之北氣象華勝宮內鑿大池引西湖水注之其上疊石為山象飛來峯有樓曰聚遠凡禁

藥周回分四地東則香遠清深

梅臺竹堂

月臺梅坡松竹三

徑菊芙蓉竹

清妍

醲

清新

木

芙蓉岡南則載忻

大堂乃

忻欣

古栢

射廳臨賦

荷花山子

燦錦

金林檎

至樂

池上

半丈紅

李郁

清曠

木樨

瀉碧

養金魚處

西則冷泉

古

丈杏館靜藥

牡丹

浣溪

大樓子海棠

北則絳華

羅本亭

旱舡俯翠

茅

春桃盤松

松在西湖上

得之以歸

垂拱崇政殿

臨安府治舊錢王宮也規制宏大宮人焚蕩之餘無復存者紹興南巡因以為行宮其制甚朴休兵後始作垂拱

崇政二殿其修廣僅如大郡之設廳淳熙再修亦循其舊每殿為屋五間十二架修六丈廣八丈四尺殿南簷屋三間修一丈五尺廣亦如之兩朵殿各二間東西廊各二十間南廊九間其中為殿門三間六架修二丈廣四丈六尺殿後擁舍七間壽皇因以為延和殿至今因之蓋聖人卑宮室而盡力乎溝洫之意

東宮樓觀

東宮舊無有孝宗及信王未出閣但聽讀于資善堂紹

興三十二年孝宗為太子始居東宮在麗正門內其地甚隘莊文太子立復居之莊文薨其妃子出外第光宗立為太子孝宗謂輔臣曰今次東宮却不須創建朕宮中空間不用宮殿甚多可撥移修立由是工役省淳熙二年夏始創射堂一為游藝之所圃中又有崇光玉淵清賞等堂鳳山樓皆燕息之地也紹興末欲以為泰安宮既而不果云

建炎巡幸六宮數

建炎庚戌之秋高宗自金陵將欲幸浙西以避北兵乃

先請隆祐太皇太后奉祖宗神主之神御而往南昌其

六宮百司皆從之此時庶事皆草創而六宮洎先朝舊

人通共不滿四百之數皇太后之殿五十二人

哲宗朝之人

潘賢妃之位三十五人

元懿太子之母也

又周夫人之位二十

一人

此未詳

慕容美人之位一十五人

亦哲宗朝之人也

張修容

之位一十六人

英宗朝之人也

又淑國王夫人一十九人其康

國蕭夫人之位一十七人而和國王夫人之位一十六

人又嘉國朱夫人之位一十四人而成國吳夫人之位一十五人又潤國張夫人之位一十九人其惠國孫夫人之位亦一十四人又有張直筆之位一十八人又孫典字之位一十五人而劉直筆之位有二十人又尚服朱夫人之位有二十三人

以上諸夫人者並在禁中職掌事者

又張才人之

位有二十三人

即張賢妃之位也

總計有三百八十有三人而

敵薄南昌衛尉亦皆潰散其時皇太后倉卒之間向南而去其皇后與賢妃皆是村夫荷轎而奔馳六宮之婢

妾宦官以至于死亡散失者亦不計其數也

建炎雜記乙集卷三